

中華全國風俗志 上篇卷三

▲浙江

●總志

(周禮職方氏)東南曰揚州。其民二男五女。其畜宜鳥獸。其穀宜稻。

(吳越春秋)水行山處。以船爲車。以楫爲馬。

(漢書地理志)吳越之君。皆尙勇。故其民好用劍。

(左思吳都賦)士有陷堅之銳。俗有節概之風。

(隋書地理志)江南之俗。火耕水耨。食魚與稻。以漁獵爲業。信鬼神。好淫祀。君子尙禮。庸庶敦龐。

(宋史地理志)人性柔慧。尙浮屠之教。厚於滋味。善進取。急圖利。而奇技之巧。出焉。
(葛禮錢塘賦)歌唐誦虞。詠仁蹈德。長者皆不厭不倦。幼者亦克岐克疑。升降以齒。人遵長幼之序。漸摩有素。俗安禮義之守。學古者不知力農之勞。通衢者不知奇巧。

之法。熙熙陶陶。含哺鼓腹。沐浴皇靈。優游化圖。

(咸淳臨安志)有車船橈樞之蹟。故其人至今忠以勤。有苗山封爵功德之會。故其人至今勸於爲善。有犀貝橘柚之貢。故其人至今知尊君而愛親。

(志雅堂雜鈔)兩浙上直天市垣。故市易浩瀚。

(周起莘雷琴記)兩浙人文區藪。浙以西之文華而靡。浙以東之文清以淑。

(舊浙江通志)浙東多山。故剛勁而隣於亢。浙西近澤。故文秀而失之靡。

● 杭州

錢塘縣 (後漢書張霸傳)郡中爭厲志節。習經者以千數。道路但聞絃誦之聲。

(隋書地理志)山澤沃衍。有海陸之饒。珍異所聚。故商賈並湊。

(歐陽修有美堂記)其民富足安樂。其習俗工巧。邑屋華麗。

(蘇軾上執政書)三吳風俗。自古浮薄。而錢塘爲甚。雖室宇華好。被服粲然。而家無宿春之儲。

(蘇軾表忠觀碑)其民老死不識兵革。四時嬉遊。歌鼓之聲相聞。

(晁補之七述)杭俗尙工巧。家夸人鬪。窮麗殫好。八方之民。車湊舟會。角富而衍寶。

(秦觀雪齋記)其俗工巧。羞質樸而尙浮華。且事佛爲最勤。

(葛澧錢塘賦)俗享再稔之利。婦蠶八育之綿。

(夢梁錄)杭州湖光山色之秀。鍾爲人物。所以清奇特傑。爲天下冠。

(方輿勝覽)市列珠璣。戶盈羅綺。湖山信美於他邦。獄訟亦煩於諸郡。

(武林舊事)制度禮文。彷彿東京之盛。

(戴表元學古堂記)三吳之州。莫大於杭。其地水穠山妍。其人機慧疎秀而清明。其俗通商美宦。安娛樂而多馳驅。

(萬歷杭州府志)省城士夫。多愛惜名檢。不敢以貴勢凌人。鄉人以事爭競來質者。多閉門謝之。無敢武斷。凡置買田宅。皆平價貿易。若度越疆界。公行占據者。輒爲清議所擯。山澤舟航之利。世業在人。不忍攘之。以自封殖。蓋雖無公儀拔葵風度。而自

放於禮法之外者鮮矣。至於大夫守令。有愷悌宜民者。同聲頌之。無異詞。其執持公道。崇讓清議。爲列郡稱首。庶民雖日覲上官威儀。至以獄訟造庭者。蒲伏不敢出氣。其馴良畏法如此。

(萬歷杭州府志)鄉先達有於肅愍之戮力王室。不顧私家。故其民尙奇節。而恥言勢利。有胡端敏之慷慨致身。見形察影。故其民長慮却顧。而務扶幽微。有王僉憲琦之清介絕俗。故其民知廉潔。而好義。有項郎中麟之力卻餽遺。故民多檢飭。而惡貪。近世如江大參之世篤忠貞。惠憲副隆之杜門掃軌。張少參銓之不昵貴幸。翁太守相之靜退自甘。許右史應元之內外修潔。高文端儀之正色立朝。江學憲圻之純孝清修。此數君子者。大則成功於再造。次則義烈於鄉邦。次則行修於一己。斯皆足以激厲士心。敦厚風俗。爲杭之表式。彬彬盛矣。

(徐之夔告鄉賢文)茲邦以德行文學事功風節顯者代不乏人。

(錢塘縣志)婦女雖喜華服飾。而閭閻之習尙勤率作。每日絡絲。精紙及箴。緞。履。襪。

之類。日可入錢闕口。

(仁和縣志)地無曠土。田無不耕。

海寧縣 (胡程儒學記)鹽官地並海。民逐魚鹽爲生。列肆負販。自張九成師弟。以儒學顯一時。三年之間。磊落相望。

(陳昱鹽官縣廳壁記)耕桑之地。足以衣食。魚鹽之利。足以資給。

(劉基送張知縣序)大民儒儒。小民愉愉。朝出暮歸。謳歌滿塗。

(張安茂儒學記)鹽官地濱東海。蓋僻壤云然。人文之盛。甲於四方。邑之隸武林者。九弗能尙也。

(海寧縣志)風俗簡儉。農耕婦織。家給人足。俗尙敦慤。鮮有游民。其民操牟盆者。輸鹽租。治桑麻者。任土貢。

富陽縣 (楊維禎曹侯惠政碑)富陽無沃土美壤。以當大府之需。故民勞而貧。俗訐而澆。

（宣德富陽縣志）富陽雖濱江。居民不以魚鹽爲業。男力耕耨。女勤蠶織。田野樸厚。士習禮讓。慕高逸。亦專科舉之習。有弦誦之風焉。

（口州府志）業詩書者。崇氣節。居畝畝者。敦樸素。

（富陽縣志）邑人率造紙爲業。老小勤作。晝夜不休。村落多種柏樹。參差成行。採子爲膏。以應造燭之用。

餘杭縣（劉希賢潛公并記）尊愛長吏。有兩都餘風。

（徐一夔縣學記）餘杭山水之邑。其民多秀而知學。

（嘉靖餘杭縣志）早作宴休。開闢種藝。務盡地利之所有。男務耕作。女勤織紉。尤善御蠶。閭閻童穉。皆知服業。百工技藝。舊皆外郡之人。今多出本邑。

（嘉靖餘杭縣志）俗近還淳。富室子弟。循循雅飭。崇樸素。而去浮華。遠詐僞。而近禮義。差役樂於趨事。士大夫皆崇尚名節。婚嫁喪葬。一從簡約。

（餘杭縣志）山水清佳。風氣樸茂。孝弟力田。有太古之遺。

臨安縣 (孫觀縣學記) 居大山谷中。桑麻絲枲之富自足。而無貧民。

(徐一夔縣學記) 風俗淳固。其人素知詩書。

(黃汝亨縣志序) 其俗簡樸而勤。

(嘉靖臨安縣志) 民尚樸素。爭訟寡少。士知學問。禮義漸興。男務耕桑。女勤蠶織。疾病多信巫鬼。喪葬多尙佛老。

(臨安縣志) 俗重遷徙。數十世不忍析居。故著姓較他邑獨蕃。山多田少。鮮巨富。祇竭力農桑。以給公輸。乏勞產。無奇技淫巧。婦女縲絲。北工於南。商賈買茶。南多於北。於潛縣 (邵文炳袞繡堂記) 俗儉而質。民勁而武。難服而易化。受敬而不忘。

(於潛縣志) 男務耕桑。女務紡織。治生之勤。踰天下。山多田狹。賦稅不及。省會大縣十一。樸魯尙質。務本寡訟。篤信巫鬼。喪葬多用佛老。

新城縣 (方廉縣志序) 新城爲縣。僻處山間。地瘠而產薄。俗嗇而用儉。敦厚樸茂之風。未始或泯。山居野處。不競紛華。男耕女織。不習浮曠。君子以儉小。人以嗇。

(萬歷杭州府志)訟簡民安。閭閻之樂。可想見也。

(新城縣志)草萊盡闢。機杼聲聞。有淳厚之風。士民冠服布素。禮汰繁文。仕則廉謹持法。不苟榮祿。

昌化縣 (陳居仁縣學記)僻在巖谷。務本力田。教明俗化。俊秀輩出。衣冠相望。

(錢鉞譙樓記)民樸以茂。恆事耕作。樵採以自食其力。口爭鬪訟。汗

(萬歷杭州府志)刀耕火種。力殫於山。菑畚刈穫。山盡於地。楮漆薪炭。貨殖於商。勤生嗇用。視棄一錢如拱璧。家延經師。爭自磨淬。章縫之盛。倍於往昔。民有疾。輒巫禱。故知醫者少。

(昌化縣志)環山而處。敦土爲安。俗尙淳龐。多至性。

(杭州府志)冠禮。男子年十六。筮吉日。選賓僕。告諸家廟。三加訓戒。女子于歸。日母爲之加笄。重昏媾也。昏禮。士大夫家。以門第相尙。謀諸媒氏。通東閭名。佐以簪珥綵幣。謂以傳紅。彼此持帖往還。又謂之拜望。次行納采。咸尙豐美。又次納徵。復以羊酒。

果餌相餽。謂之加筭。婚期尙行親迎。古禮間用綵轎。華燈鼓吹前導。迨至中堂。婿婦行交拜禮。合巹後。盛服出拜翁姑。次及尊長。至閭巷細民。多從簡約。喪禮始卒。男兒女髮。分計受唁。親友多致奠賻。猶存古意。七日一祭。好作佛事。葬前靈輜。前陳列方相銘旌。導以鼓吹。仙梵墓所親友。執紼畢集。合窆始歸。閱三日。展祭新阡。謂之覆窆。祭重生辰諱日。牲醴酒醴。備極豐潔。清明各攜穀核香燭。親詣封塋。展拜酌酒焚楮。十月掃墓亦如之。立夏祭先。薦陳時物。較他府爲獨重。至歲時伏臘。或祭於家。或祭宗廟。豐儉不一。皆藉是以展追遠之敬也。

（夢梁錄）元日。耆大夫交相賀。細民男女亦鮮衣往來拜節。遊玩琳宮梵宇。竟爲不絕。

（西湖遊覽志）正月朔。爲椒柏酒。以待親戚隣里。以春餅爲上供。熟栗炭於堂中。謂之旺相。貼青龍於左壁。謂之行春。插芝麻梗於簷頭。謂之節筍。高簋柏枝於楹。餅以大橘承之。謂之百事大吉。自此少年游冶。翩翩徵逐。至十八日收燈。然後歸。

工人返肆。農商各執其業。

(杭州府志)元宵前後。五夜張燈。通衢委巷。懸額綴綵。皆以錦緞采繡爲之。如入萬花谷中。終夕鼓吹不絕。鄉村婦女。於十五夜。召口姑。以卜一歲吉凶。并蠶田豐歉。

(夢梁錄)二月朔。中元節。民間以青囊盛百穀爪菓子種。互相遺送。爲獻生子。花朝。都人往錢塘門前。至玉壺古柳林。雲洞嘉會門外。包家山。張太尉園。玩賞奇花異木。包山桃開如錦。障極可愛。

(杭州府志)二月花朝。以往。士女爭先出郊。謂之探春。畫舫輕舟。櫛比鱗集。先南屏次放生池。湖心亭。岳王墳。盧舍菴。後入西陵橋。放鶴亭。北來臯亭山。劉墳村。每當春日。桃花盛放。一望如錦。游人多問津焉。

(武林舊事)清明。人家上冢。南北兩山間。車馬紛然而野祭者尤多。如大昭慶九曲等處。婦人澹粧素衣。提攜兒女。酒壺穀核。村店山家。分餞遊息。至暮。則花柳土宜。隨車而歸。

（錢塘縣志）上巳。出遊西湖。士女皆帶薺花。

（海甯縣志）四月立夏日。以諸果品雜。署茗椀。親隣彼此餽送。名曰七家茶。

（西湖遊覽志）四月八日。俗傳爲釋迦佛生辰。僧尼各建龍華會。以小盆坐銅佛。浸以糖水。覆以花亭。錢鼓迎往。富家以小杓澆佛。提唱偈誦。布施財物。

（昌化縣志）四月八日。寺僧以棟葉染米。作烏飯供佛。或分送檀越。

（夢梁錄）端午日。家買桃柳。葵榴。蒲艾。并市菱縵。五色水團。時果。五色瘟紙。當門供養。佩赤靈符。采百草製藥。以辟邪。

（杭州府志）端午祀神享先畢。各至河干湖上。以觀競渡。龍舟多至數十艘。岸上人如蟻。近日半山龍舟爭盛。俱於朔日奔赴。游人雜沓。不減湖中。

（西湖遊覽志）七夕市中。以土木雕塑孩兒。衣以綵服。號爲摩喉羅。

（夢梁錄）七夕女郎望月。瞻斗列拜。次乞巧於牛女。或取小蜘蛛。以金銀盒盛之。次早觀其網絲圓上。名曰得巧。中秋登樓。臨軒酌酒高歌。爲竟夕歡。

(元和郡縣志)江濤常以月十日二十五日最小三日十八日極大每年八月十八日數百里士女共觀舟人漁子泝濤觸浪謂之弄潮。

(西湖遊覽志)九日以蘇子微漬梅滷雜和蔗霜梨橙玉榴小顆名曰春秋菊。

(夢梁錄)九日以五色粉塑成獅蠻以小綵旗簇之以熟栗爲細末入麝香糖蜜和之貫酒玩菊以應節序。

(武林舊事)十月杭人競售錦裝新歷門神桃符鍾馗狻猊虎頭及金縷綵花春帖旛勝之類爲市甚盛。

(夢梁錄)十月朔士庶出郊掃墓冬至歲節士庶所重餽遺儀文及舉杯相慶祭告宗禋加於常節除夜換桃符門神鍾馗祭祀宗祖夜則迎神備香花供物圍爐團坐謂之守歲。

● 嘉興

嘉興縣 (葛邲貢院記)得江山之助其人秀而文。

(方輿勝覽)土膏沃饒。風俗淳秀。文賢人物之盛。前後相望。百工技藝。與蘇杭等。

(至元嘉禾志)罕習軍旅。尤慕文儒。不憂凍餒。頗勤農務。

(楊維禎聚桂軒記)秀在宋爲文物之邦。至今士多興於學。處壓者亦類皆鴻生碩彥。

(宏治嘉興府志)嘉禾之俗。終歲勤動。餉給於國。而尺寸之土必耕。衣被他郡。而機杼之聲不絕。士人好文而崇學。衣冠文物。煥然可觀。

(萬歷嘉興府志)春秋時。攜李當吳越之交。自越王甲粢乙黍。丙菽丁粟。非夫人之織不衣。而農桑重。吳王鑄山。賁海。而鹽鐵重。務本節用。寢以富強。

(萬歷嘉興府志)聲名文物。冠裳濟濟。逡巡揖讓。無少惰容。秉禮之家。不踰矩矱。

(蕭子鵬忌樂堂記)章甫縫掖之士。閭閻秩秩。

(李貞開烟雨樓賦)城郭森羅。市廛錯列。高門納駟。甲第連雲。紅粟流行。禮樂孔殷。
(蔣靜黃田港閘記)富商大賈。長棧巨舶。夷蟻海錯。魚鹽米布之屬。輻輳城市。居民

富饒市邑繁盛。

(李日華秀水百詠序)賦稅日增。生齒日盛。才傑輩出。爲時名鄉。第宅宮廬。不讓兩京。陸無險巖。樹藝得食。其膏水無衡激。餘臚得以走集。

(黃洪憲縣志序)邑人士多饒秀。嫻文章。接轍傳圭。弁冕吳越。

(秀水縣志)秀邑人士斤斤自好。以孝弟力田爲本務。

嘉善縣 (錢福水利成功碑記)嘉善膏腴之壤。平鋪如席。無高山大澤。賦稅戶田。最爲繁盛。

(宏治嘉興府志)士慕文儒。沃土腴壤。民不勸而耕。樂從乎上。視他邑固易易也。然而信巫鬼。崇異教。豈舊習未革歟。

(胡潔表賢錄序)邑之俊造。皆師古好學。其民淳樸易治。

(章士雅縣志序)人文鬱勃。風氣淳龐。土沃而民饒。

(莫大勳儒學序)魏塘忠孝節義。甲於嘉禾。理學科名。聲高東國。麟麟炳炳。自昔攸

聞。謂非教育涵養者深歟。

（姚宏漢築城碑記）樂田畝。重興作。

海鹽縣（李正民鹽學記）海鹽地形高仰。潮汐之至。非有山谷隄防。而人居以安。其土黃壤。其井泉甘。魚鹽之利既溥。又溝洫之水。不可瀦畜。故民皆服田力穡。利於早熟。市廛編戶。家給人足。喜教子弟以詩書。士大夫之裔亦各世守其業。地既斗絕。一隅舟楫人跡罕至。無奇貨異產。動其耳目。故能安習而不遠。

（李斐小學記）里巷間絃誦之聲相接。

（許氏貽謀）男勝耕。悉課農圃。女勝機。悉課蠶織。

（弘治嘉興府志）海鹽素習魚鹽之利。俗樸而好文。儉而知義。安土而不樂商賈。士大夫喪葬。率用古禮。閭閻多化之。

（海鹽縣志）鹽邑斥鹵。民率煮海爲鹽。田圃之間。所產者。禾麥麻稗而已。其他多資之旁邑。易之商旅。

石門縣 (□□儒學記) 稻蟹之利。轉徙數州。

(朱德潤鄉賢祠記) 士美民秀。夙稱多賢。

(貝瓊西郭生傳) 俗質而尙文。

(陳履縣志序) 崇故良邑。以易治稱。

(陳允堅學田記) 禦兒故稱饒庶。

(石門縣志) 石邑接壤杭湖。士大夫尙文學。習禮義。然射利近華。信鬼重巫。習未盡革也。至重桑麻。勤稼穡。民多淳樸。

平湖縣 (宏治嘉興府志) 平湖多秀民。天性巧慧。重文學。尙氣節。其居田野者。夫耕婦織。最爲勤苦。然信巫鬼。重淫祀。習奢侈。挾智鬪訟者。往往有之。年來文教漸盛。而風俗亦漸移易矣。

(朱維熊義學碑記) 湖邑大海廻環。生其地者。多鍾九峯三泖之秀。以故名臣輩出。科名甲七邑。

(平湖縣志)邑既僻處東偏。工作無他技巧。泉多於桑。布浮於帛。士大夫家。勤女工。猶什之七。

(平湖縣志)其境僻無叢奸。其習樸無竄貨。其去鄉重。其射利慳。故男不逋。敵女不下機。

桐鄉縣 (至元嘉禾志)兼并勝。挾口善鬪。楚越之口口。

(莫光朝青鎮徙役記)青鎮介湖秀之間。水陸輻輳。生齒日繁。富家大姓。甲於浙右。(宏治嘉興府志)俗務農而習樸。高原樹桑麻。下隰種禾麥。尺寸無曠者。

(桐鄉縣志)桐處古吳越之疆。秦伯遜讓之遺風。夏禹勤儉之遺習。漸漬既久。兼而有之。

(至元嘉禾志)冠禮。男子十六始冠。亦有昏而冠者。女子于歸乃笄。聚族張筵。凡冠笄。皆炊大餅。餽遺親里。始諱其名而字之。昏禮納采。納徵。委禽。親迎。多遵古道。喪禮始卒。以六輪經辨。生肖所忌。曰批書。男免女。效用綿及帛。斂畢。設銘旌。賓始弔。每